



SA Jagters- en Wildbewaringsvereniging
SA Hunters and Game Conservation Association
Bewaring deur volhoubare benutting / Conservation through sustainable utilisation

SPORTSKIET: UNIVERSELE REËLS

Inhoudsopgawe

1. Algemeen
2. Skietbaanveiligheidsreëls en Standaardbevele
3. Beskerming, ondersteuning en hulpmiddels
4. Gewere
5. Knaldempers
6. Trompreme en tromprem/knaldemper kombinasies
7. Inneem van hoër skietposisies en mediese of fisiese beperking
8. Tydperk op die skietpunt vir skuts “om gereed te maak”
9. Deel van vuurwapens deur skuts tydens streek- en nasionale skietkompetisie
10. Afkoelperiode vir gewere
11. Hantering van ondiensbare vuurwapen
12. Bystand en/of afrigting tydens streek of nasionale skietkompetisies
13. Telling
14. Erkenning
15. Gedrag, toerusting, tegnieke of enige iets anders wat nie in die gees van die spesifieke skietoefening is nie
16. Dispuutkomitee
17. Inligtingsessies en opleiding van Baanoffisiere/-beamptes voor skietkompetisie
18. Inligtingsessies van deelnemers voor skietkompetisie

1. Algemeen

- 1.1 Dié dokument (Sportskiet: Universele Reëls by Skietoefeninge) is van toepassing by alle SAJWV Sportskiet-Skietoefeninge waar van toepassing;
- 1.2 Belangrik: Hierdie Universele Reëls is aanvullend maar vervang nie die spesifieke reëls van elke skietoefening/-dissipline nie – waar daar enige teenstrydigheid/dubbelsinnigheid is geniet die reëls van die spesifieke skietoefening/-dissipline voorkeur.

2. Skietbaanveiligheidsreëls en Standaardbevele

- 2.1 Verwys na “Skietbaan veiligheidsreëls vir Deelnemers” en “Standaardbevele op die skietbaan” - vir laai, ontlai en veiligheidsprosedures.
- 2.2 Vertolking van die reëls: Indien 'n skut/ouer of afrigter onseker is van hulle toerusting of die vertolking van die reëls, kan hulle die organiseerders/baanoffisiere voor die aanvang van die aflossing vra om dit te verduidelik.

3. Beskerming, ondersteuning en hulpmiddels

3.1 Oor- en oogbeskerming

- 3.1.1 **Oorbeskerming** is verpligtend vir skuts op die skietpunt en ook vir toeskouers binne 15 m van die skietpunt;
- 3.1.2 **Oogbeskerming (skietbrille)** is verpligtend vir skuts op die skietpunt en die skut moet deur die bril kyk en die bril moet dus die oë van die skut ten volle beskerm – die gebruik om bo-oor of onder-deur die bril te kyk is nie toelaatbaar nie.

3.2 **Skiettafels** - die gebruik van skiettafels word nie toegelaat nie, behalwe waar die skietdissipline dit spesifiek toelaat soos bv. vir ingeperkte persone en by bankrus (*benchrest*) skietoefeninge.

3.3 **Geweerbande** - geweerbande word nie toegelaat by Sportskietoefeninge nie.

3.4 Skietbaadjies en skiethandskoene

- 3.4.1 **ligte jag/skietbaadjies** mag gebruik word. Skyfskietbaadjies (bv. stywe Bisley tipe skiet-baadjies met hake en gespes wat die baadjie styftrek rondom die skut se lyf), word nie toegelaat nie.
- 3.4.2 **Skiethandskoene** mag slegs gebruik word waar die skietdissipline dit spesifiek toelaat en dan moet dit lig en buigsaam wees en mag op geen wyse ondersteuning aan die hand en/of gewrig verleen nie;
- 3.4.3 Die algemene beginsel vir beide skietbaadjies en handskoene is dat dit slegs beskerming moet bied aan die skut teen koue, ruwe oppervlaktes ens. en in die geval van skiethandskoene ook vir 'n beter greep waar nodig, maar dit mag absoluut geen ondersteuning vir die hand of gewrig bied nie.

3.5 Die gebruik van 'n “spotting scope” of verkyker word slegs toegelaat vir skuts waar die skietdissipline dit toelaat. Toeskouers mag nie “spotting scope” of verkykers gebruik nie;

3.6 **Windmeters en persoonlike vlaggies** word nie toegelaat nie.

3.7 **Ballistiese programme** op tablette of selfone word toegelaat.

3.8 **Alle selfone/tablette** op die skietpunt se klank moet af wees.

3.9 **Kolfhakke** aan gewere word nie toegelaat nie tensy die skietdisipline dit spesifiek toelaat:



4. Gewere

Semi-outomatiese gewere is toelaatbaar waar die skietbaan en die reëls van die skietdisipline/-oefening dit toelaat. **Vol outomatiese gewere en -handwapens word nie toegelaat nie.**

5. **Knaldempers** op gewere is toelaatbaar.

6. **Tromprems (muzzle brakes) en tromprem/knaldemper kombinasies op vuurwapens op streek en nasionale vlak word nie toegelaat nie** tensy die skietdisipline se reëls dit toelaat. Tromprems en tromprem/knaldemper kombinasies op vuurwapens is 'n probleem (dit veroorsaak hoë vlakke van ongerief in terme van klank, "muzzleblast" en dikwels stof) en ongerief van naburige skuts moet verhoed word.

7. Inneem van 'n hoër skietposisie en mediese of fisiese beperking

Indien 'n skut nie 'n voorgeskrewe posisie **kan** (a.g.v. 'n mediese of fisiese beperking) of **wil** (a.g.v. voorkeur) inneem nie, mag die skut 'n hoër posisie inneem, maar die hoër posisie mag nie beter ondersteuning as die laer posisie geniet nie. Die skietposisie is van laagste (lê) na hoogste (staan) in die volgende volgorde: lê, sit-, kniel- en staanposisie. Die baanoffisier moet so 'n skut, akkommodeer na gelang van omstandighede, sonder om hom of haar 'n onregverdigte voordeel te bied en sonder om veiligheid op te offer. Indien 'n skut twyfel in die verband moet hy/sy voor die aflossing begin skiet aan die baanoffisier rapporteer, wat dan 'n beslissing sal maak en die ander skuts in die aflossing sal inlig indien enige ander vergunning toegestaan word.

8. Tydperk op die skietpunt vir skuts "om gereed te maak"

Na die bevel "neem skietposisie in" gegee is, het skuts tyd soos toegelaat per skietdisipline om voor te berei vir die skietoefening. Die tyd kan verkort word mits al die skuts aangedui het dat hulle gereed is. Hierdie reël het die doel om onnodige verspeling van tyd deur skuts op die skietpunt, te beperk.

9. Deel van vuurwapens deur skuts tydens streek- en nasionale skietkompetisies

9.1 Die volgende algemene voorwaardes geld vir die deel van wapens:

9.1.1 Die persone wat 'n geweer deel moet in aparte aflossings skiet om enige ongerief vir die ander skuts in 'n aflossing te verhoed;

9.1.2 Die praktyk om in dieselfde aflossing op elke afstand eers die een skut en dan die ander skut te laat skiet met dieselfde vuurwapen terwyl die res van die aflossing moet wag vir die tweede skut word nie toegelaat nie;

- 9.1.3 Die lisensiehouer moet teenwoordig wees en soos toeskouers ten minste 10m agter die skietpunt wees terwyl die lisensiehouer toesig hou terwyl die nie-lisensiehouer skiet;
- 9.1.4 slegs toesig deur die lisensiehouer word toegelaat, afrigting word nie toegelaat nie;
- 9.1.5 Die verantwoordelikheid berus by die skuts wat die wapen deel om te verseker dat hulle die organiseerders by voor-af registrasie reeds in kennis stel watter persone die wapen deel om te verseker dat die administrateurs van die kompetisie hulle betyds in aparte aflossings indeel.

9.2 **Verdere spesifieke voorwaardes vir die deel van senterslag jaggewere:**

- 9.2.1 Dit word tussen enige twee persone toegelaat;
- 9.2.2 'n maksimum van twee persone mag 'n vuurwapen deel op dieselfde dag by dieselfde kompetisie;
- 9.3 **Verdere spesifieke voorwaardes vir die deel van luggewere en 22 randslaggewere:** Meer as twee persone mag 'n luggeweer of randslag geweer deel mits die hoeveelheid aflossings dit kan akkommodeer.

10. **Afkoelperiode vir gewere**

Indien daar 'n afkoelperiode volgens die reëls van die skietdisipline voorgeskryf word tussen die skietoefeninge kan die baanoffisier die skuts vra of hulle 'n afkoelperiode wil gebruik. 'n Eenparige besluit deur al die skuts in die aflossing word vereis om te bepaal of 'n afkoelperiode nodig is of om dit te verkort. Indien een of meer skuts versoek dat hulle wel 'n afkoelperiode wil gebruik, dan moet hulle versoek voorkeur kry en die afkoelperiode soos voorgeskryf moet toegestaan word.

11. **Hantering van 'n ondiensbare vuurwapen**

'n Skietoefening moet met een vuurwapen voltooi word. Geen deelnemer mag sy vuurwapen wissel met 'n ander vuurwapen gedurende 'n skietoefening nie. 'n Vuurwapen wat ondiensbaar raak a.g.v. 'n onderdeel wat breek of onklaar raak en nie doelbewus deur die skut veroorsaak is nie mag wel vervang word met 'n tweede soortgelyke wapen sonder om die skietoefening se vloeï te onderbreek in die Baanoffisier se oordeel. Die Baanoffisier moet bevestig dat die vuurwapen wel ondiensbaar is alvorens die skut toegelaat word om 'n nuwe wapen te gebruik.

'n Ondiensbare vuurwapen is 'n wapen wat nie gelaai, onklaar of afgevuur kan word op 'n normale wyse nie en potensieel gevaarlik kan wees vir die skut en omstanders. 'n Vuurwapen wat geval het of gestamp is en die visiere of teleskoop is sodanig beskadig dat die Baanoffisier dit visueel kan waarneem word ook as ondiensbaar geklassifiseer. Ander voorbeelde van ondiensbare wapens is: 'n dop wat in die kamer vassit of afgebreek het of 'n sneller wat onverwags "lig" afgaan wanneer die grendel gesluit word.

Die skut moet toestemming vra en kry by die Baanoffisier om 'n tweede vuurwapen te gebruik. Bv. op die Beperkte Grendelaksie skietoefening breek die dop af in die geweer se kamer met die tweede skoot op die 100m staan oefening. Die skut vestig die Baanoffisier of Baanbeampte se aandag op die probleem. Die Baanoffisier bevestig dat die vuurwapen ondiensbaar is en die skut kry toestemming om vir die oorblywende oefeninge 'n ander geweer te gebruik. Die skote nie geskiet op die 100m oefening nie verbeur die skut vir tellingdoeleindes. Enige skoot wat tydens die skietoefening in 'n veilige rigting afgevuur is, al het die skoot afgegaan as gevolg van bv. 'n foutiewe sneller, sal vir telling doeleindes as 'n kwalifiserende skoot beskou word.

Twee skuts mag nie dieselfde vuurwapen in dieselfde aflossing gebruik indien 'n vuurwapen ondiensbaar raak nie. Hierdie is 'n praktiese reëling om die ontwrigting van die ander skuts te verhoed.

Snellerdruk: daar is geen beperking op snellerdruk nie, maar dit is die skut se verantwoordelikheid om te verseker dat die snellerdruk op sy vuurwapen veilig is. Nalatige, voortydige (vroee) en laat afvuur van skote en optrede teen skuts word hanteer in item 15.4.

12. Bystand en/of afrigting tydens streek of nasionale skietkompetisies

- 12.1 Afrigting of bystand tydens streek of nasionale skietkompetisies word nie toegelaat nie.
- 12.2 Die skuts op die skietpunt mag tydens die skietoefening met mekaar kommunikeer maar die kommunikasie mag nie ander skuts ontwrig nie. Skuts mag op geen manier met nie-skuts kommunikeer nie.
- 12.3 Gedurende deelname deur 'n ingeperkte skut, mag hy/sy fisies bygestaan word om in posisie te kom tot op die skietpunt en die skut mag verder bygestaan word op die skietpunt indien nodig geag en in die uitsluitlike oordeel van die Baanoffisier, maar geen afrigting word toegelaat nie.

13. Telling

- 13.1 **Lynskote** - Indien 'n skoot 'n lyn tussen twee aangrensende tel-areas op die teiken raak, kry die skut die voordeel van die hoër telling. Die lyn moet net geraak wees en hoef nie heeltemal gebreek te wees nie. Geen koeëls of ander voorwerpe mag in die gat gedruk word nie.
- 13.2 **Kaliber meetplaatjie** - Indien daar twyfel bestaan moet 'n SAJWV Sportskiet kaliber meetplaatjie (*caliber gauge*) gebruik word om te bepaal of 'n skoot die lyn raak of nie. Die lyne van die sirkels op die kaliber meetplaatjie vir die verskillende kalibers se buitedeursnee is kalibergrootte en indien die lyn van die sirkel wanneer gesentreer oor die koeëlgat, die lyn op die teiken raak, dan word die telling bepaal as 'n skoot wat die lyn raak.
- 13.3 **Fotos met Sellulêre telefone** – indien daar twyfel bestaan oor twee, drie of meer skote deur dieselfde gat in die teiken, word die gebruik van 'n selfoonfoto aanbeveel wat vergroot kan word as bystand om die besluit te neem.
- 13.4 **Skoot na die tyd geskiet** - Indien 'n skoot ná die bevel “stop” geskiet word, verloor die skut die hoogste punt op die teiken.
- 13.5 **Te veel skote op die teiken** - In die geval waar daar te veel skote op 'n teiken is, moet die baanoffisier eers bepaal of daar skote kort op die omliggende teikens. Indien wel, moet daar eerstens probeer word om onderskeid volgens kaliber te tref:
- 13.5.1 Daar kort skote op omliggende teiken/s en onderskeid volgens kaliber is wel moontlik: Die teiken met die ekstra skoot/skote se telling word bereken na die ekstra skoot/skote weggelaat is. Die oortreder wat op 'n verkeerde teiken geskiet het, verbeur die telling vir die skote wat op sy/haar eie teiken kort.
- 13.5.2 Daar kort skote op omliggende teiken/s en onderskeid volgens kaliber is nie moontlik nie: Indien dit nie moontlik is om onderskeid volgens kaliber te tref waar daar te veel skote op die teiken is nie, word eerste die laagste telling afgetrek, daarna die hoogste en dan weer die laagste totdat al die oortollige skote verreken is. Indien die skut voel dat hy benadeel word, kan hy versoek om die oefening oor te skiet. Die oortreder wat op 'n verkeerde teiken geskiet het verbeur die telling vir hierdie skote.
- 13.5.3 Indien daar egter te veel skote op 'n teiken is, en niemand kort enige skote in die omgewing nie, en die kalibers kan nie onderskei word nie, dan word die hoogste tellings verminder totdat die korrekte aantal skote op die teiken oorbly. Die skut het in die geval nie die keuse om die oefening oor te skiet nie.
- 13.6 **Uittel van wenners met gelyke tellings tydens skietkompetisie**
- 13.6.1 stap 1 – gebruik die aantal x om uit te tel per skietoefening, daarna

13.6.2 stap 2 - gee meer waarde aan die skietoefening op die langste afstand indien gelyke totale wedstrydtellings, indien van toepassing

14. **Erkenning**

Slegs die eerste skietoefening op 'n dag kwalifiseer as 'n erkende kwalifiserende telling vir registrasie (op die taktabelt) en 'n moontlike skietbalkie – 'n tweede en daaropvolgende pogings se resultate geld nie. Dit geld ook vir streek en nasionale skietkompetisies, behalwe indien die spesifieke skietoefening/-dissipline dit toelaat.

15. **Gedrag, toerusting, tegnieke of enige iets anders wat nie in die gees van die spesifieke skietoefening is nie** - Enige gedrag, toerusting, tegnieke of enige iets anders wat volgens die baanoffisier nie in die gees van 'n spesifieke skietoefening is nie, onveilig is of ander skuts verontref mag deur die Baanoffisier verbied word. Indien daar twyfel in die verband bestaan, moet dit met die Dispuutkomitee uitgeklaar word.

15.1 **Selfoonprotokol op die skietpunt** – Alle skuts en Baanoffisiere/-beamptes se selfone/tablette moet op “silent” wees tydens skietaktiwiteite. Skuts mag nie oor selfone gesels nie. Baanoffisiere/-beamptes mag slegs selfone gebruik vir amptelike funksies soos bv. die neem van fotos of die hou van tyd. Geen ander gebruike van selfone wat Baanoffisiere/-beamptes se aandag aftrek van hul funksies/verantwoordelikhede word toegelaat nie.

15.2 **Nie-rook areas** – skietpunte tot en met 10m agter die skietpunt en veiligheidsareas is nie-rook areas tydens skietaktiwiteite.

15.3 **Kleredrag** – Skuts se kleredrag moet van so 'n aard wees dat dit nie 'n verleentheid vir ander skuts, toeskouers en baanoffisiere/-beamptes skep nie, en die oordeel van die hoofbaanoffisier in die verband is finaal. Die skut sal deur die hoofbaanoffisier versoek word om die kleredrag reg te stel alvorens die skietoefening begin of om die skietbaan te verlaat. Indien die skut verkies om die skietbaan te verlaat sal dit as 'n diskwalifikasie aangeteken sal word.

15.4 **Spesifieke reëls i.v.m. toerusting:** Die volgende spesifieke reëls geld in verband met toerusting op die skietbaan waar van toepassing:

15.4.1 Geen harde oppervlakte soos 'n houtplank, plastiek- of metaalplaat ens. is toelaatbaar op die skietpunt as rus vir skietstok of Harris tipe “bi-pod” of “monopod” nie. Die skietmat moet buigbaar en opvoubaar wees;

15.4.2 Die skietmat of geweesak mag verder gebruik word in die sit of knielposisie om 'n sagte oppervlakte vir beskerming te skep om op te sit of te kniel (bv. onder die knieë), maar dit mag nie gebruik word vir ondersteuning of om die wapen of enige deel van die liggaam te stut nie.

15.4.3 'n Normale skut (geen liggaamlike beperking) se toerusting moet van so 'n aard wees dat hy/sy in staat is om self al sy toerusting vir een skietoefening op die skietbaan te dra van een skietpunt na die volgende. 'n Senior persoon of 'n ingeperkte skut kan deur 'n helper bygestaan word.

15.5 **Dissiplinêre optrede teen skuts wat veiligheids-, skietoefening- of kompetisiereëls oortree of hom/haar nie aan die bevele van die Baanoffisier onderwerp nie – verwys na item 15 van die Handleiding vir Baanoffisiere:**

15.5.1 Onveilige optrede deur 'n skut – in die geval van onveilige optrede deur 'n skut, maak die Baanoffisier die besluit en sy beslissing is finaal;

15.5.2 Die volgende oortredings moet in die oordeel van die Baanoffisier op die telkaart aangeteken word as “voorlopig” met 'n beskrywing van die oortreding en verwys word na die Dispuutkomitee vir 'n beslissing:

15.5.2.1 oortreding van 'n skietoefening- of kompetisiereël en/of

15.5.2.2 doelbewuste oortreding van kompetisiereëls deur 'n skut om hom/haarself te bevoordeel.

15.6 Nalatige, voortydige (vroee), en laat afvuur van 'n skoot en optrede teen 'n skut.

15.6.1 Die volgende definisies word aangehaal uit die SA Jagters Baanoffisierhandleiding:

15.6.1.1 Item 2.5: **Nalatige afvuur van 'n skoot** - is die afvuur van 'n skoot, of 'n besering veroorsaak is al dan nie, wat gebeur terwyl die skietbaan veilig is, m.a.w. voor die Baanoffisier die skietbaan as "gesluit" verklaar het of na die Baanoffisier die skietbaan as "veilig" verklaar het;

15.6.1.2 Item 2.6: **Voortydige (vroee) afvuur van 'n skoot** – is die afvuur van 'n skoot wat gebeur tussen die Baanoffisier se bevel "die baan is gesluit" en die bevel om te begin skiet, of dit gegee word deur 'n fluitjie te blaas of die bevel "vuur"!;

15.6.1.3 Definisie van nuwe item: **Laat afvuur van 'n skoot** – is enige afvuur van 'n skoot wat gebeur na die Baanoffisier se bevel "stop" en voor die bevel "ontlaai, maak veilig"

15.6.2 Optrede teen skut in die geval van:

15.6.2.1 'n **Nalatige skoot** – die skut word dadelik gediskwalifiseer en moet sy wapen veilig maak op bevel van die Baanoffisier en die skietpunt verlaat. Die skut mag aan geen verdere skietaktiwiteite vir die dag deelneem nie en geen telling word vir die dag geregistreer nie – dit geld by skietaktiwiteite op tak-, streek- en nasionale vlak en die Baanoffisier moet 'n "Verslag van Insidente" voltooi en volgens voorskrifte indien.

15.6.2.2 'n **Voortydige (vroee) skoot** – die Baanoffisier sal oordeel of die skoot 'n veiligheidsoortreding was al dan nie. Eerste voorbeeld: Indien die skoot geskiet is na die bevel "almal is gereed – staan by" en die skoot is veilig in die skietwal vasgeskiet, verbeur die skut daardie skoot en die punte wat dit potensieel kon verteenwoordig. Tweede voorbeeld: Indien die skoot geskiet is voor die bevel "almal is gereed – staan by" word die prosedure soos in item 15.4.2.1 vir nalatige skote gevolg: die skut word dadelik gediskwalifiseer en moet sy wapen veilig maak op bevel van die Baanoffisier en die skietpunt verlaat. Die skut mag aan geen verdere skietaktiwiteite vir die dag deelneem nie en geen telling word vir die dag geregistreer nie – dit geld by skietaktiwiteite op tak-streek- en nasionale vlak en die Baanoffisier moet 'n "Verslag van Insidente" voltooi en volgens voorskrifte indien.

15.6.2.3 'n **Laat skoot** – met die laat afvuur van 'n skoot wat veilig in die skietwal vasgeskiet is verbeur die skut daardie skoot en die 10 punte wat dit potensieel kon verteenwoordig.

16. 'n **Dispuutkomitee** bestaande uit **ten minste** drie lede moet saamgestel word - verwys na "Dispuutkomitee en -proses".

17. Inligtingssessies (*briefing sessions*) ter voorbereiding van Baanoffisiere/beamptes vir skietkompetisies

Belangrik: Indien daar voor 'n kompetisie enige twyfel bestaan oor die detail kennis van baanoffisiere/beamptes oor onderstaande reëls, dan moet die Hoofbaanoffisiere vooraf (nie die oggend van die kompetisie nie) 'n opleidingsessie reël om te verseker dat die baanoffisiere en -beamptes die reëls ken en verstaan. Baanoffisiere wat onseker is oor reëls op die dag van die skietkompetisie dra by tot verwarring, frustrasie en ontevredenheid by skuts.

17.1 Bevestig dat baanoffisiere elkeen 'n kopie van die volgende in sy besit het en detail kennis van die volgende reëls het:

17.1.1 Sportskiet: Universele Reëls

- 17.1.2 Spesifieke skietdisipline/-oefeningreëls vir die dag:
- 17.2 Bevestig die hantering van skuts wat reëls oortree en die gepaste optrede deur die baanoffisier – verwys na die Handleiding vir Baanoffisiere vir “Prosedures i.v.m. die oortreding van kompetisie- en/of veiligheidsreëls” en item 15.5 van hierdie Sportskiet: Universele Reëls vir skietoefeninge.
- 17.2.1 Die Baanoffisier **is die verantwoordelike persoon, het die finale gesag op die skietbaan en dit is sy plig** om teen onveilige en ongehoorsame deelnemers op te tree.
- 17.2.2 Opdragte van Baanoffisiere moet onvoorwaardelik en onmiddellik uitgevoer word.
- 17.2.3 Baanoffisiere moet uiteraard te alle tye redelik en professioneel optree, maar hulle moet nie huiwer om op te tree as daar oortreding van veiligheidsreëls, skietoefening- of skietkompetisie- reëls deur ‘n deelnemer is nie.
- 17.3 Bespreek tipiese gevalle van reëls wat skuts gereeld oortree om die baanoffisiere voor te berei waarvoor hulle moet oplet, maar nie beperk daartoe nie:
- 18. Inligtingsessies (*briefing sessions*) van deelnemers voor ‘n skietkompetisies**
- 18.1 Verduidelik die dagprogram en reëlins i.v.m. bv. die invul van vrywaringsvorme, inskiet van wapens, verversings, waar noodhulp beskikbaar is, ens.
- 18.2 Bevestig dat skuts die volgende reëls ken en antwoord enige vrae in die verband wat nodig mag wees;
- 18.2.1 Sportskiet: Universele Reëls, uitgerek November 2023
- 18.2.2 skietbaan veiligheidsreëls;
- 18.2.3 skietoefeninge- en skietkompetisierreëls;
- 18.2.4 vestig die skuts se aandag daarop, dat indien hy/sy op enige stadium twyfel oor enige van bogenoemde, die skut die baanoffisier/beampte moet vra vir die nodige inligting;
- 18.3 Samestelling van die Dispuutkomitee (wie is die persone wat op die Dispuutkomitee dien) en hoe hantering van dispute op die dag hanteer sal word.
- 18.4 Bevestig die hantering van skuts wat reëls oortree en die gepaste optrede deur die baanoffisier – verwys na item 15.5 van hierdie Sportskiet: Universele reëls vir skietoefeninge:
- 18.4.1 Die Baanoffisier **is die verantwoordelike persoon, het die finale gesag op die skietbaan en dit is sy plig** om teen onveilige en ongehoorsame deelnemers op te tree.
- 18.4.2 Opdragte van die Baanoffisier moet onvoorwaardelik en onmiddellik uitgevoer word.
- 18.5 Bespreek tipiese gevalle van reëls wat skuts oortree, maar nie beperk daartoe nie:



SA Jagters- en Wildbewaringsvereniging
SA Hunters and Game Conservation Association

Bewaring deur volhoubare benutting / Conservation through sustainable utilisation

SKIETBAAN VEILIGHEIDSREËLS

SKIETBAAN VEILIGHEIDSREËLS:

1. Die Baanoffisier het die finale gesag op die skietbaan en het die reg om teen onveilige en ongehoorsame deelnemers op te tree.
2. Opdragte van die Baanoffisier moet onvoorwaardelik en onmiddellik uitgevoer word.
3. Deelnemers is onderhewig aan die betrokke skietbaan se reëls en moet die Baanregister en die Vrywaringsvorm teken.
4. Geen persoon onder die invloed van alkohol of narkotiese middels mag die skietbaan betree nie.
5. Geen alkohol mag tydens die skietoefening op die skietbaan gebruik word nie.
6. Vuurwapens moet ongelaaï op die skietbaanterrein arriveer in 'n doelgemaakte sak of tas.
7. Vuurwapens mag net uit 'n sak of tas gehaal word in direkte opdrag van die Baanoffisier op die skietpunt en die lope moet dan te alle tye in 'n veilige rigting gerig wees.
8. Vuurwapens mag nie op die skietpunt hanteer word terwyl enige persoon voor die skietpunt is nie.
9. Deelnemers wat 'n handwapen aan hulle liggaam dra moet dit aan die Baanoffisier of –beampte verklaar, onder toesig veilig maak op die skietpunt en weer terugplaas in die holster aan sy liggaam. Die handwapen mag slegs weer gelaai word na die skut die skietbaan verlaat het en op pad uit die skietbaanterrein is.
10. Veilig verklaarde vuurwapens moet in sakke of tasse wees tydens beweging tussen skietpunte.
11. Gehoor- en oogbeskerming is verpligtend.
12. Toeskouers en wagtende deelnemers moet ten minste 10m agter die skietpunt wees, of buite die sigveld van die Baanoffisier. Voorts moet hulle gehoorbeskerming dra en stil wees terwyl geskiet word.



DRUKLUG VEILIGHEIDSREËLS

DRUKLUG VEILIGHEIDSREËLS I.V.M. DIE HANTERING VAN DUKSILINDERS VIR HERVULLING VAN DRUKLUGGEWERE EN DRUKLUGGEWEER SILINDERS:

1. Duiksilinders vir die hervulling van drukluggewere moet elke 2 jaar geïnspekteer word, waarvan elke tweede inspeksie (elke vierde jaar) 'n hidrostatische toets moet wees. Slegs silinders wat die nodige inspeksies slaag, en 'n plakker of stempel het om dit te bewys, mag vir hervulling van luggewere gebruik word;
2. Silinders vir die hervulling van luggewere moet in 'n raam of trollie wees, en die raam of trollie moet die "kop" van die silinder beskerm;
3. Geen silinder met meer as die toegelate druk (200bar of 300bar afhangende van die silinder) mag vir hervulling gebruik word nie;
4. Geen silinder mag hoër as die heup gedra word by 'n SAJWV skietgeleentheid op tak, streek en nasionale vlak nie.
5. Drukluiggeweer silinders se lewensduur is slegs 10 jaar. Drukluiggewere moet elke 10 jaar vir inspeksie by 'n gerespekteerde handelaar gaan, waartydens daar 'n sertifikaat of brief uitgereik moet word met 'n vervangingsdatum van die silinder. Hou asb die sertifikaat of brief by die geweer indien dit nagegaan moet word. Die inspeksie van drukluiggewere soos hier beskryf, vir gebruik by die SAJWV moet op datum wees.
6. Dit bly die ouer of voog se verantwoordelikheid om seker te maak dat daar aan die bostaande vereistes voldoen word en dit kan wel en kan op tak-, streek- en nasionale vlak nagegaan word. Indien daar nie aan die vereistes voldoen word nie, kan die drukluiggewere of duiksilinder se gebruik verbied word op SAJWV skietbane.
7. 'n Veilige hervulpunt, gewoonlik heel voor op die skietbaan, sal deur die Hoofbaanoffisier aangewys word en drukluiggewere moet daar gevul word, met die loop van die geweer wat ten alle tye in 'n veilige rigting wys. Slegs een geweer mag op 'n slag per hervulpunt gevul word, met 'n maksimum van twee hervulpunte per skietbaan, ten minste 20m uitmekaar. Let daarop dat oog- en oorbeskerming verpligtend is tydens die vul van drukluiggewere en dat daar 'n Baanoffisier teenwoordig moet wees ten tye van hervulling.
8. Silinders moet na vulling ten minste 15meter agter die skietpunt neergesit word en mag nie tussen toeskouers wees nie. Silinders moet so ver moontlik nie in direkte sonlig neergesit word nie.